



Acadèmia de su Sardu

ONLUS

*de su pagu, pagheddu
dae su pagu si faghet su meda*

Lìtera a sos candidados a Presidente de sa Regione Sarda

A sos Candidados istimados

On. Ugo Cappellacci

Prof. Pier Franco Devias

Dot.ra Michela Murgia

Prof. Francesco Pigliaru

On. Mauro Pili

Prof. Gigi Sanna

S'Acadèmia de su Sardu onlus pentzat de fagher cosa profetosa faghinde a ischire a sos elettores sardos su parre chi Bosàteros nd'azis susu paritzas preguntas chi pertocan sa limba sarda. Sas rispostas bostras an a esser pubricadas in su zassu e in sa pàgina facebook de s'Acadèmia.

1 S'Acadèmia est de su parre chi solu intrende sa limba sarda comente matèria curricolare in totu sas iscolas mannas e piticas e in s'universidade diat esser s'unicu modu de poder frimare s'abbandonu de sa limba nostra e si diat poder dare a su sardu s'alenu chi li faltat. Ite nde pentzat Vostè susu de custa chistione? Ite pentzat de fagher, comente e in cantu tempus pro resesser a mandare addenanti sa **L.R. 26/1967** e sa **L. 482/1999**, pius che àteru in s'iscola? No pentzat Vostè chi siat lòmpidu s'ora chi sa Regione impreet su podere chi at pro aparitzare **s'ufitziu de s'iscola sarda**, chi potat detzidire sos programas de imparu?

2 S'Acadèmia est de su parre ca **s'esperimentu** de politica limbistica chi sa Regione at mandadu addenanti sa **LSC, Limba Sarda Comuna** (*"Adozione delle norme di riferimento a carattere sperimentale per la lingua scritta in uscita dell'Amministrazione regionale [deliberazione n. 16/14 del 18/04/2006, oggetto, p. 1] da utilizzarsi in via sperimentale per*





Acadèmia de su Sardu

ONLUS

*de su pagu, pagheddu
dae su pagu si faghet su meda*

l'uso scritto in uscita [deliberazione p. 2]" **siat faddidu**. Tantu est beru chi: **a)** issa at lassadu su Sardu fora dae s'iscola, est a narrer fora dae su logu chi dat pius profetu, pro chi sa limba non benzat a mancu; **b)** no est mai lòmpidada in su Cussizu regionale, est a narrer in su **Parlamentu nostru**; **c)** est una limba mesturada, pesada in laboratòriu, ducas chena literadura; **d)** non solu de esser *comuna* a sos chi faeddan su sardu, ma non los at aunidos pro nudda, los at divididos, ca sa LSC at su fundamentu logudoresu e ducas nd'at generadu una *Apartheid* limbistica, ca at postu a un'ala totu sos sardos chi non faeddan logudoresu.

Ite nde pentzat Vostè de sa LSC? No est de acordu cun s'*Acadèmia* ca una limba chi at divididu sos Sardos, chi no est aprovada dae su **Parlamentu** nostru, ne cussizada dae sas Universidades de Sardinnia, ne apretziada dae su pòpulu e chena literadura, po custas tzemas, non podet mai intrare in s'iscola e chi fintzas ponìnde-la a impèriu che limba de ufiziu diat esser una limba atesu dae su pòpulu, chi, po contra, si meressit una **limba de ufiziu** cantu pius faghet acanta a sae de onzi die? Non pentzat de retzire a totu sos chi no sun abarrados pretziosos e mudos pro custu esperimentu, comente sa Provìntzia de Casteddu, po mannària su segundu Ente de sa Sardinnia, ca in su 2010 nd'at achipidu sas **Arrègulas de su Campidanesu**, como impreadas fintzas, *de facto*, dae medas comunes e dae medas fainas chi sun bessidas iscritas in cudda norma (duos bocabolàrios, un'evanzèliu, pregadorias, tradusciones apretziadas e lègidas in sas iscolas)? O comente mastras e mastros de iscola, pentzamentosos de manizare una limba, che-i sa LSC, atesu dae sa limba de late de sos piseddos e de sos pitzocos? O comente sos triballidores de sa limba sarda, iscritores e nois de s'*Acadèmia de su Sardu onlus*, chi amos iscritu una litera, essida in totu sos giornales, a totu sas istitutziones regionales, nende totu su pentzamentu nostru susu su dannu chi est faghinde sa polìtica limbistica de sa Regione fintzas a oe?

E pentzat Vostè ca in tempus de democratzia, in su de 21 séculu, fetat tambene a catigare sa voluntade e sa soberania de su pòpulu chi in pius de milli annos de istòria **at detzididu de mandare addenanti duas bariedades limbisticas e literàrias, su Campidanesu e su Logudoresu**, chi sun lòmpidas, grascias a sos cantadores e a su populu matessi chi lu apretziat, e tenner *de facto* cadaunu unu standard?





Acadèmia de su Sardu

ONLUS

*de su pagu, pagheddu
dae su pagu si faghet su meda*

3 S'*Acadèmia* est de su parre ca su pentzamentu ca su sardu siat unu dialetu e non una limba (chi faghet a creer a medas sardos ca est menzus chi sos fizos issoro non lu faedden) siat fizu de su **proibitzionismu limbìsticu**, intradu dae su Fascismu in su 1923 e sighidu fintzas a su tempus de sa Repùbrica (1999), isterrìnde-si pro 76 annos.

Non pentzat Vostè ca siat ora chi su Presidente de sa Regione Sarda nerzat ufitzialmente a sos Sardos ca cussu tempus est agabadu, in su mamentu chi est intrada sa leze 482/1999? E ducas non pentzat Vostè ca sa Regione luego depet achipire **unu Standard** (su de sa Limba sarda) **cun duas Règulas (is Arrègulas de su Campidanesu** già iscritas e achipidas dae sa Provìntzia de Casteddu e impreadas *de facto* dae medas comunes già dae 4 annos, e sas **Règulas de su Logudoresu**), comente at reguladu sa voluntade popolare dae milli annos in goi?

4 S'*Acadèmia* est de su parre ca sa leze 26/99 siat betza e pòbera.

Non pentzat Vostè ca sa Regione che depet **intrare una leze noa susu de sa limba sarda**, chi diat mèdios pro fagher intrare su sardu, in pius de s'iscola, fintzas in sa **ràdiu** e **televisione** pùbricas (piusdetotu in sa Rai), in sa crègia, in sa giustiscia, in s'ispidale e in àteros ufitzios pùbricos?

5 S'*Acadèmia* est de su parre chi tocat a cuntratare cun s'Istadu po chi **su sardu siat riconnotu comente limba ufiziale acanta a s'italianu**. Ite nde pentzat Vostè? At a fagher custa gherra?

6 S'*Academia* est de su parre chi tocat a torrare a ponner sos lùmenes de logu in sardu.

Ite nde pentzat Vostè? Amos a tenner sa carta geogràfica de sa Sardìnnia chena deper pius leger sos lùmenes sardos istropiados dae sos cartògrafos colonizadores?

Gràscias a Bois pro s'atenscione chi azis a tenner pro nois.





Acadèmia de su Sardu

ONLUS

*de su pagu, pagheddu
dae su pagu si faghet su meda*

Lìtera a is candidaus a Presidenti de sa Regioni Sarda

A is Candidaus stimaus

On. Ugo Cappellacci

Prof. Pier Franco Devias

Dot.ra Michela Murgia

Prof. Francesco Pigliaru

On. Mauro Pili

Prof. Gigi Sanna

S'Acadèmia de su Sardu onlus pensat de fai cosa profetosa a fai a sciri a is eletoris sardus su parrimentu de Bosu apitzus de unas cantu preguntas chi pertocant sa lingua sarda. Is arrespustas Bostas ant a essi publicadas in su giassu e in sa pàgini facebook de *s'Acadèmia*.

1 S'Acadèmia est de su parrimentu ca **sceti intrendi sa lingua sarda che a matèria curricolari in totu is scolas mannas e piticas e me is universidadis** s'iat a podi firmari su sperdiziamentu de sa lingua nosta e s'iat a podi donai a su sardu is alientus chi dd'amancant.

Ita ndi pensat Issu apitzus de custa chistioni? Ita pensat de fai, comenti e in cantu tempus po arrennesci a **ponni a caminai diaderus sa L.R. 26/1997 e sa L. 482/1999**, pruschetotu in sa scola? No pensat Issu chi siat l'òmnia s'ora chi sa Regioni imperit su poderi chi tenit po apariciari **s'Ofitziu de sa Scola Sarda** chi potzat detzidi is programmas de imparu?

2 S'Acadèmia est de su parrimentu ca **s'esperimentu de politica linguistica** chi sa Regioni nd'at pesau cun **sa LSC, Limba Sarda Comuna** ("Adozione delle norme di riferimento a





Acadèmia de su Sardu

ONLUS

*de su pagu, pagheddu
dae su pagu si faghet su meda*

carattere sperimentale per la lingua scritta in uscita dell'Amministrazione regionale [deliberazione n. 16/14 del 18/04/2006, oggetto, p. 1] da utilizzarsi in via sperimentale per l'uso scritto in uscita [deliberazione p. 2]" **siat faddiu**. Difatis: **a)** cussa delibera at lassau su Sardu foras de sa scola, est a nai foras de su prus logu profetosu po chi sa lingua no si sperdat; **b)** no est mai lòm pia in su Consillu regionali, est a nai **in su Parlamentu nostu**; **c)** est una lingua amesturada pesada in laboratòriu, duncas sena de literadura; **d)** impasa de essi comuna a is chi fueddant su sardu, e duncas impasa de auniri a custus Sardus, ddus at partzius, ca sa LSC est a fundòriu logudoresu e duncas nd'at ingenerau una **Apartheid** linguistica, ca at **postu a una parti** a totu is sardus chi no fueddant logudoresu.

Ita ndi pensat Issu de sa LSC ? No est diacòrdiu cun s' *Acadèmia* ca una lingua chi partzit is Sardus, chi no est aprovada de su **Parlamentu** nostu, ni consillada de is Universidades de Sardinnia, ni apretziada de su pòpulu e sena de literadura, po custas tzimias no at a podi mai intrai a scola e ca finsas imperendi-dda che a lingua de ofitziu iat a essi una lingua atesu de su pòpulu chi, po contras, si merescit una **lingua de ofitziu cantu prus fait acanta de sa lingua-de-lati cosa sua**? No pensat de donai audièntzia a totu is chi no funt abarraus prexaus e citius po custu esperimentu, comenti sa Provìntzia de Casteddu, po grandesa su segundu Enti de sa Sardinnia, ca in su 2010 nd'at achìpiu is **Arrègulas de su Campidanesu**, imoi imperadas puru, *de facto*, de medas comunus e de medas fainas chi funt bessias scritas in cussa norma (duus fueddàrius, unu vangelu, pregadorias, tradusiduras apretziadas e lìgias in sa scola)? O comenti is maistas e maistus de scola, impensamentaus de depi manixai una lingua, che sa LSC, atesu de sa lingua-de-lati de is pipius e de is picocus? O comenti is traballantis de sa lingua sarda, scridoris, e nosu de s' *Acadèmia de su Sardu onlus*, chi eus scritu una litera, bessia in totu is giornalis, a totu is istituzionis regionalis, narendi totu su pensamentu nostu apitzus de su dannu chi est faendi sa polìtica linguìstica de sa Regioni finsas a oi?

E pensat Issu ca in tempus de democratzia, in su de 21 sèculus, fatzat tambeni a apetigai sa boluntadi e sa soberania de su pòpulu, chi in prus de milli annus de stòria **at ditziddu de ndi pesai duas bariedadis linguìsticas e literàrias, su Campidanesu e su Logudoresu**, chi funt lòm pias, gràtzias a is cantadoris e a su pòpulu matessi chi ddus aprètziat, a tenni *de facto* a cada unu standard?





Acadèmia de su Sarddu

ONLUS

*de su pagu, pagheddu
dae su pagu si faghet su meda*

3 S' *Acadèmia* est de su parrimentu ca su pensamentu chi su sardu siat unu dialetu e no una lìngua (chi portat a crei a medas sardus chi siat mellus a no ddu imparai a is fillus insoru) siat fillu de su **proibitzionismu linguìsticu**, intrau de su Fascismu in su 1923 e sighiu finsas a su tempus de sa Repùblica (1999), stentendi-sì po 76 annus.

No pensat Issu chi siat ora chi su Presidenti de sa Regioni Sarda nerit ofitzialmenti a is Sardus ca cuddu tempus est acabau a s' ora chi est intrada sa lei 482/1999? E duncas no pensat Issu ca sa Regioni ndi depat – luegus chi podit – achipi **unu Standard** (su de sa Lìngua sarda) **cun duas Arrègulas** (is **Arrègulas de su Campidanesu**, giai scritas e achìpias de sa Provìntzia de Casteddu e imperadas *de facto* de medas comunus giai de 4 annus, e sas **Règulas de su Logudoresu**), a comentis at stabilèssiu sa boluntadi popolari de milli annus a oi?

4 S' *Acadèmia* est de su parrimentu chi sa **L.R. 26/1997** siat bècia e pòbera.

No pensat Issu ca sa Regioni iat a depi **intra** **una lei noa apitzus de sa lìngua sarda**, chi donit is ainas po fai intra su sardu, in prus che in sa Scola, finsas in s' **arràdiu** e **televisioni** pùblicas (pruschetotu in sa Rai), in sa **crèsia**, in sa **giustìtzia**, in su **spidali** e in àterus ofitzius e istitutzionis pùblicas?

5 S' *Acadèmia* est de su parrimentu ca tocat a cuntratai cun su stadu po chi su **sardu bessat** **lìngua ofitziali acanta de s'italianu**.

Ita ndi pensat Issu? At a fai custa batalla?

6 S' *Acadèmia* est de su parrimentu ca tocat a **torrai a ponni is nòminis de is logus in sardu**.

Ita ndi pensat Issu? Eus a tenni sa carta geogràfica de sa Sardìnnia sena de depi prus ligi is nòminis de logus sardus strupiaus de is cartògrafus colonisadoris?





Acadèmia de su Sardu
ONLUS

*de su pagu, pagheddu
dae su pagu si faghet su meda*

Bosi torraus gràtzias po su càstiu chi nos' eis a donai.

Càstia puru <http://www.academiadesusardu.org/litera> a is candidaus a Presidenti de sa Regioni Sarda.

